

Nipilersortartut nipilersornikkut isertitaat B-tut nalunaarsorsinnaangortinnissaat pillugu, A-tulluunniit akileraartussatut nipilersortitsisumiit akissarsitinneqartarlutik toqqagassinneqarsinnaangornissaannut periarfissat pillugit Naalakkersuisut misissoqqullugit Inatsisartut aalajangiiffigisassaattut siunnersuut. Inatsisitigut suut allangortinneqassanersut misissuinerup qulaajassavai, qanorlu taamatut aaqqissuussinikkut allaffissornikkut aningaasatigullu kingunerissanerai takutinneqassallutik. Misissuinnerup inenera Inatsisartunut agguanneqassaaq kingusinnerpaamik UPA2023

Inatsisartunut ilaasortaq Aqqalu C. Jerimiassen, Atassut

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Hans-Peter Poulsen, Siumut, siulittaasoq

Inatsisartunut ilaasortaq Jens-Frederik Nielsen, Demokraatit, siulittaasup tullia

Inatsisartunut ilaasortaq Hans Aronsen, Inuit Ataqtigiit

Inatsisartunut ilaasortaq Agathe Fontain, Inuit Ataqtigiit

Inatsisartunut ilaasortaq Kuno Fencker, Siumut

Inatsisartunut ilaasortaq Lars Poulsen, Siumut

Inatsisartunut ilaasortaq Jens Napaattooq, Naleraq

UPA 2022-mi ulloq 11. maj 2022 siullermeerinninnerup kingorna ataatsimiititaliap sunnersuut misissorpaa.

Siunnersuutip imarisaa siunertaalu

Nipilersortartut nipilersornikkut isertitaminnik B-tut nalunaarsuinissamut periarfissinneqarsinnaanerannut isertitaasaluunniit nipilersortitsisumit akileraarutitut A-tut ilanngaatigineqarsinnaanerannik periarfissat misissorneqarnissaat siunnersuuteqartumit kissaatigineqarpoq.

Siuliani taaneqartutut nipilersortartut periarfissinneqarnerisa aningaasaqarnikkut, allaffissornikkut inatsitigullu kingunerisinnaasaanik qulaajaallutik misissuinissamut Naalakkersuisut peqquneqarnissaat siunnersuuteqartup kissaatigaa.

Siunnersuutip Inatsisartunit siullermeerneqarnera

Siunnersuut taama iluseqartillugu partiinit annikitsuinnarmik tapersorsorneqarpoq. Naalakkersuisut allannguutissatut siunnersuummi imaattumik saqqummiussipput:

”Naalakkersuisut akileraartarnermik nutarterinermut ilanngullugu, nipilersortartut eqqu-miitsuliortullu isertitaannik ajornannginnerusumik assigiiaarnerusumillu qanoq pisariaqartitsinermik misissuinissamut peqquneqarnissaat pillugu Inatsisartunut aalajangiiffigissatut siunnersuut.”

Siunnersuut Aningaasaqarnermut Akileraartarnermullu Ataatsimiititaliamit suliarineqartussanngorlugu innersuunneqarpoq.

Ataatsimiititaliap siunnersuummik suliarinninnera

Siunnersuuteqartoq naapertorlugu siunnersuuteqarnermi pingaarnertut anguniarneqarpoq nipilersortartut isertitaminnik akileraaruteqaataasussanik B-tut nalunaarsuinissaminnut periarfissinneqarnissaat. Tamatumunnga siunnersuuteqartup tunngavilersuutigaa nipilersortartut inuusutissarsiummik ingerlatsisutut isigineqartariaqarnerat aammalu akileraartarnikkut taamatut pineqartariaqarnerat. Siunnersuuteqartoq isumaqarpoq taamaaliunnginneq assigiinngisitsinerussasoq.

Nipilersornermik ingerlatsinermi aningaasarsiat ullumikkut isertitatut A-tut isigineqartarput. Aningaasarsianik taakkuninnga tunniussinermi akileraarutit A-t ilanngaatigineqassapput. Nipilersornermik ingerlatsinermi aningaasarsiat isertitatut B-tut isigineqarsinnaanersut misissorneqassasoq siunnersuuteqartumit kissaatigineqarpoq. Tamatuma aningaasaqarnikkut allaffissornikkullu kingunerisassai misissuinermut ilanngunneqassapput.

Ataatsimiititaliap paasinninnera naapertorlugu nipilersornermik ingerlatsinermi aningaasarsiat isertitatut A-tut allaffissornikkut ingerlanneqarnerat aningaasarsiat B-tut akileraarutigineqartussaatillugit akilersinniarneqarnerisa ajornakusoorsinnaaneranik pissuteqarpoq. Nipilersortartut saniatigut inuusutissarsiummik ingerlatsisut allat aaqqissuussinermut tassunga ilaammata ataatsimiititaliamit ilisimaneqarpoq.

Nipilersortartut namminneq fakturamik nassiussinissamut periarfissinneqartariaqartut siunnersuuteqartumit arlaleriarluni oqaatigineqartoq ataatsimiititaliamit maluginiarneqarpoq. Siunnersuutip matuma taasissutissartaanut sanilliullugu pisisoq imaluunniit tunisisoq fakturaliussanersoq isummerfigissallugu soqutiginaateqanngitsutut ataatsimiititaliamit isigineqarpoq. Faktura niueqatigiinnerup ingerlanneqarsimaneranut uppernarsaatitut ataatsimiititaliamit taamaallaat isigineqarpoq. Suliamut matumunnga tunngatillugu ataatsimiititaliamut apeqqut pingaarneq tassaavoq akileraartarnermik aqutsinerup illuatungeriinnut naapertuunnerpaap qanoq anguneqarsinnaanerata misissorneqarnissaa.

Akilerartarnermik aaqqissuusseqqinnermik annertuumik ukiunilu arlalinni suliarineqartussamik aallaartitsisimanerminnik Naalakkersuisut oqariartuutaat ataatsimiititaliamit maluginiarneqarpoq. Naalakkersuisuttaaq paasissutissiissutigaaq akilerartarnermik aaqqissuusseqqinnermi ungasissoq isigalugu anguniagaq pingaarneq tassaasoq akilerartarnermik aqutsinermik pisariillisaanissaq. Siunnersuummik siullermeerinninnermi Naalakkersuisut allannguutissatut siunnersuummik saqqummiussipput, tassani siunertarinearqarluni akilerartarnermik aaqqissuusseqqinnerup ilaatut nipilersortartut eqqumiitsuliortullu isertitaasa pisariinnerusumik assigiimmillu akileraaruserneqarnissaanik pisariaqartitsinermik misissuinnissaq. Inuussutissarsiortulli allat taamatut aamma inissisimasut misissuinnermut tassunga ilanngunneqarnissaat pissusissamisoortutut ataatsimiititaliamit isigineqarpoq.

Akilerartarnermik aaqqissuusseqqinnermik suliap Naalakkersuisunit aallartinneqartup qanoq ingerlanneqartussatut naatsorsuutigineqarnera aammalu tamanna suliniutinik qanoq ittunik naatsorsuuteqarfigineqarsinnaanersoq erseqqinnerusumik tusagaqarfigissallugu ataatsimiititaliamit qilanaarineqarpoq. Tamanna pillugu Naalakkersuisut piaartumik ilisimatitsissuteqarnissaat kissaatigineqartoq ataatsimiititaliamit maluginiarneqarpoq.

Tamanna tunngavigalugu Naalakkersuisut allannguutissatut siunnersuutaat, siullermeerinninnermi tapersorneqarluartoq, ataatsimiititaliamit isumaqatigittumit taperserneqarpoq.


Siunnersuutip aningaasaqarnikkut kingunerisassai

Siunnersuutip aningaasaqarnikkut allaffissornikkullu pisortanut innuttaasunullu kingunerisassatut siunnersuutigineqartumit naatsorsuutigineqartut ataatsimiititaliamit oqaaseqaatissaqarfigineqanngillat.

Ataatsimiititaliap inassuteqaatai:

Naalakkersuisut allannguutissatut siunnersuutaat **akuerineqassasoq** ataatsimiititaliamit **isumaqatigiittumit** inassutigineqarpoq.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.



Hans Peter Poulsen
Siulittaasoq




Jens-Frederik Nielsen
Siulittaasup tullia



Hans Aronsen




Agathe Fontain



Kuno Fencker



Lars Poulsen



Jens Napaattooq